

AKASHVANI AIZAWL
REGIONAL NEWS BULLETIN
HEADLINES (EVENING)

Date – 09/12/2025

Time - 18:30 -18:40Hrs

- Lai Autonomous District Council inthlana vote tla vawiina chhiar ah party mala sawrkarna siam thei an awm lo a, MNF chuan seat la hnem berin bial 8 ah hnehna an chang a ni.
- Mizoram sorkarin khualkhuuaa thite ruang phurh man atan cheng nuai 167 point 81 a pe chhuak tawh.
- Mizoram Universal Healthcare Scheme hmangin damlo 55,483 enkawlina senso pek a ni tawh a; MUHCS kalpuitu damdawi-in hrang hrangte hnenah sorkarin damlo an enkawlina bill atan cheng vbc 86 point 65 a pe tawh.
- Vawiin khan Lok Sabha-ah Election Reforms chungchang leh Rajya Sabha-ah Vande Mataram kum 150-na pual a bika sawihona hun hman a ni.

<><><>

LADC

Lai Autonomous District Council inthlana vote tla vawiina chhiar ah party mala sawrkarna siam thei an awm lo a, hetih lai hian MNF chuan seat la hnem berin bial 8 ah hnehna an chang a ni.

LADC vote tla te hi tukin dar 8 atang khan Government Lawngtlai College-a Counting Hall-ah chhiar a ni a, MNF chu bial 8 ah chakin Congress chu bial 7 ah an chak a, ZPM chu bial 6 ah chakin BJP chu bial 2 ah hnehna an chang a, Independent tinna bial 2 a awm bawk a ni.

Chief Executive Member nilai Pu N. Zangura chu a tling zo lova, LADC Chairman nilai Pu VL Hmuaka pawh tling zolo zingah a tel a, MLA ni chungah MDC chuhtu MPCC a Vice President Pu C. Ngunlianchunga chu Lawngtlai Vengpui bialah thlan tlin a ni.

MNF Gen Hqrs a Vice President Pu Lalchhandama Ralte leh MPCC Vice President Pu C. Ngunlianchunga te chuan Lawngtlaia kan palai zawhna chhangin Sorkar intawm siam chungchang ah Party thuneitute kutah a awm thu an sawi a, MNF chuan thuchhuah siamin Lai ram mipuite chungah lawmthu an sawi a, LADC inthlan result chuan sorkar dinglai ZPM mipuiin an rin tawk tawh lohzia a tarlang chiang hle tih sawiin. MNF MLA neih lohna bial pahniha seat 8 zet laa, MNF-in seat la tam ber an ni chu lawmawm antih thu sawiin LADC-ah MNF kaihhruai sorkar nghet leh chak tak a din ngei MNF chuan a duhin a beisei an ti a ni.

Hetihlai hian ZPM chuan seat la tam ber ni lo mahse kum 2020 LADC inthlanpui atanga an party hmasawna chu lawmawm antih thu an sawi a, candidate thlan tlin te an lawmpui thu an sawi a ni.

<><><>

RD&A MINISTER

Thingtlanga kuthnathawktu hmeichhiate tharchhuah zawrhna SARAS Fair chu vawiin khan RD&A Minister Prof. Lalnilawma'n Lunglei ah a hawng.

Rural Development & Administration (RD&A) Department hnuai Mizoram State Rural Livelihoods Mission (MzSRLM) huaihawt December ni 9 atanga ni 13 inkara Lungleia Saikuti Hall Ground Floor-a Regional SARAS (Sale of Articles of Rural Artisans Society) Fair vawi 12-na buatsaih hi vawiin khan bultan a ni a, Khuallian RD Minister Prof. Lalnilawma chuan MzSRLM hma lakna tam tak zingah Lakhpati Didi hnuai thingtlang nute'n kum 1-a nuai 1 tal an lak luh theih nan hma laksak mek an nih thu leh nuho thar chhuah leisak a, zuar chhawng turin Ropuiliani Women Farmer Producer Company kal tlanga hma lak a nih bakah Mizoram thar chhuah state pawna thawn chhuak turin kawng hrang hranga hma lak a nih thu a sawi.

Minister chuan thil thar chhuah leh siam chhuah deh ralna kawngah market tha leh ngelnghet a awm theih nan rinawmna a pawimawh thu sawiin kuthnawktute chu hma an sawn theih nan sawrkarin theihtawp a chhuah zel dawn a ti bawk.

Regional SARAS Fair Lungleia ah hian Mizoram RD Block 24 atangin SHG 84 telin, dawr (stall) 41 siam a ni.

<><><>

CORPES TRANSPORTATION

Mizoram sorkarin khualkhuaa thite ruang phurh man a tumsakna, 'Assistance for Transportation of Bodies of Deceased Persons within Mizoram' kaltingin ruang 1,613 phurhna man cheng nuai 167 point 81 pek a ni tawh.

Ruang phurh man buaipuitu Social Welfare department atanga Akashvani News Aizawl thudawn danin, ruang phurhna senso sorkarin a tumsakna hi nikum September thla khan hawn a ni a, December thla atangin ruang phurh man hi pek tan a ni.

Nikum September thla atanga vawiin December ni 9 thleng hian Social Welfare department chuan ruang phurh man dilna 1,613 atan cheng nuai 167 point 81 an pe tawh a; Social Welfare department hotute chuan ruang phurh man dilna hi online hmanga tih theih turin portal siam a nih thu leh peihfel a nih tawh thu an sawi rualin, portal hi hman tura tlangzarh ala nih loh thu leh thawktute tan pawh portal hman dan training buatsaih a la nih dawn thu an sawi.

Mizoram sorkar chuan ruang phurhna senso tur hi kum 2024-25 leh 2025-26 atan budget-ah cheng nuai 500 ve ve a dah a; ruang phurh inkaihhraina in a tarlan danin, ruang phurh tur chu a thlenna tur km. 20 aia hnai a ni tur a ni lo a, km. 20 piah lamah chuan tu tan pawh hman theih niin, lirthei thlen theih chin a huam a ni.

Inkaihhraina ang chuan, ruang phurhna lirthei hman man chu State Transport Authority in rate a siam anga kalpui a ni a; ruang phurhna man sorkarin a peksak hian lirthei pakhat chiah a huam a, lirthei hman theihah hian cheng nuai 17 man chin chunglam lirthei a huam lo a ni.

Ruang phurhna hlat zawng chhût nan ruang chhuahna atanga a dahna hmun inkar hlat zawng lâk tur a ni a; lirthei thlen lohna khua a nih chuan lirthei thlen theih tâwpna thleng a ni. Ruang phurhna chu kawng tawi thei ber hman tur a ni bawk.

<><><>

UD&PA MINISTER

UD&PA Minister Pu K. Sapdanga'n vawiin khan 'Multi-purpose Community Centre', Zonuam Veng ami leh Aizawl khawpuia mipui veivakte tana chawlh hahdamna tur, 'Aizawl Dawh-Rem', Zodin Square, Vanapa Hall bula mi a hawng.

Multi-purpose Community Centre (MCC) hawna inkhawm hi MCC Conference Hall, Zonua vengah buatsaih niin Minister in a hawn tak Multi-purpose Community Centre', Zonua Veng ami hi cheng nuai 500 senga sak a ni a, 'Aizawl Dawh-Rem', Zodin Square ami hi cheng nuai 145 senga sak a ni thung a ni.

Minister Pu K. Sapdanga chuan thu sawiin Multipurpose Community Centre din a nih theih nana sawrkar kaltate'n hma an lolak tawhna te fakin, khawtlang hruaitute inpekna leh inlungualnate chu lawmawm a tih thu a sawi a, Multipurpose centre a nih ang ngeia kawng hrang hranga ram leh hnam tana chhenfakawm, inlungualna leh inpumkhatna thlent lo ni deuh deuh se tiin duhsakna a hlan a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

MUHCS

Mizoram sorkarin damlote chhawmdawlina atana healthcare scheme a duan Mizoram Universal Healthcare Scheme (MUHCS) hmangin damlo 55,483 enkawlina senso pek a ni tawh a; MUHCS kalpuitu damdawi-in hrang hrangte hnenah sorkarin damlo an enkawlina bill atan cheng vbc 86 point 65 a pe tawh a ni.

Mizoram State Healthcare Society (MSHCS) hotute atanga Akashvani News Aizawl thudawn danin, kumin April thlaa MUHCS kalpui anih atanga tun thla ni 3 thleng khan MUHCS kalpuitu damdawiin te hnenah MSHCS chuan damlo enkawlina senso rulh nan pawisa an pe tawh a, pawisa an pek tawh zawng zawng hi avaiin cheng vbc 86 point 65 niin, heng pawisa hi MUHCS kalpuina damdawi-in hrang hranga damlo 55,483-te enkawlina bill a ni.

Kumin July thla khan damlo 10,652 bill atan MUHCS kalpuitu damdawi-inte hnenah cheng vbc 14 point 96 pek niin bill pek tam ber thla a ni a; April thla khan damlo bill 1,548 atan cheng vbc 1 point 09 pek niin bill tlem ber tum a ni.

Mizoram chungah MUHCS kalpuitu empanelled private hospital 13 leh empanelled private day care centre pathum a awm a; Aizawl district-ah MUHCS kalpuitu mimal damdawi-in 5 awmin a tam ber a, Lunglei district-ah damdawi-in 3 awmin, Champhai leh Lawngtlai district-ah damdawi-in 2 ve ve leh Siaha district-ah damdawi-in 1 a awm mek a ni.

MUHCS kalpuitu empanelled private day care centre pathum pawh hi Aizawl khawpuia mite an ni a; Mizoram pawnah MUHCS kalpuitu damdawi-in, empanelled hospital 25 leh deemed empanelled hospital 13 a awm mek bawk a ni.

<><><>

MPCC PRESS CONFERENCE

MPCC thupuangtu Pu Lalbiakzama chuan vawiin khan Aizawl Press Club-ah thuthar thehdarhtute kawmin, Chief minister Pu Lalduhoma'n tun hnaia Saipuma Hmar Students Association inkhawmpui a hmanpuinaah thu belhchian dawl lo engemaw zat a sawi tih sawiin, thumuhnu kaitho zawng leh Mizote inkara rilru in tihnat sak thei zawnga belhchian dawl lem lo thusawi hi sim a tan a that thu a sawi.

Pu Lalbiakzama chuan tun thla ni 5 khan Chief Minister Pu Lalduhoma'n Hmar Students Association inkhawmpui a hmanpuinaah kum 1991-92 chhoa HPC-te

movement vanglai khan Saipum khua chu Saiphaiah tihluhna nen khawm tum nia a sawi chu thu belhchian dawn lo a nih thu sawiin, tih luihna ni loin a duh tan duhthlan theihna siam a nih thu leh sorkar khan rangva leh pawisa thlengin pek a in huam a, Saipum mai ni loin Sakawrdai lamahte pawh he rawtna hi siam a nih thu leh an mahni duhthlannain chhungkaw engemaw zat chu he rawtna ang hian an pemkhawm nia hriat a nih thu a sawi a ni.

HPC-D leh Mizoram sorkar inbiaknaah Chief Minister Pu Lalduhoma'n a mimal anga hma a lak thu a sawi chu mak an tih thu sawiin Pu Lalbiakzama chuan, HPC-D palaite khan Pu Lalmuanpuia Punte chu an spokesperson anga a tel ve phalsak tura an dil angin remtihsak an ni a, Pu Lalduhoma erawh a inrawlhna an hriat loh thu a sawi.

<><><>

PRESIDENT

President Draupadi Murmu-i chuan vawiinah kut themthiam lama thawk tha te hnenah Handicrafts Award a sem. He hunah hian kum 2023 leh 2024 chhunga handicrafts lama mi hmingthate chawimawina pek a ni. Thusawiin Pi Murmu-i chuan art chuan hnam hrang hrang a thlunzawm a ti a. Kut themthiamna thil chu hnam ziarang nihna mai niloin mipui nitin khawsakna thlentu pawimawh tak a ni a ti.

Vawiin inkhawmah hian Shilp Guru Award 2023 leh 2024 atan mi 12 hnenah hlan a ni.

<><><>

LOK SABHA

Vawiin khan Lok Sabha-ah Election Reforms chungchang leh Rajya Sabha-ah Vande Mataram kum 150-na pual a bika sawihona hun hman a ni.

Lok Sabha ah chuan sawihona bultantu Congress MP Manish Tewari chuan Election Commission chu Special Intensive Revision a neih chhan chiang takin a tarlang tur a ni a ti a. Tunah hian SIR hi state thenkhatah kalpui mek anih thu sawiin heti chung hian EC chuan SIR kalpui tur hian dan tlawhchhan a nei lo a ti a. Ram danpuiah Special Intensive Revision of Electoral Rolls hi neih theihna a chuang lo a ti bawk. Pu Tewari chuan inthlan apiangin VVPAT chu a vaia chhiar tel vek anih loh chuan ballot paper hmanga inthlan kalpui a hun tih a sawi a. Election Commission member thlannaah Rajya Sabha Leader of Opposition leh Chief Justice of India te telh a rawt bawk a ni.

Hetihlai hian BJP MP Sanjay Jaiswal chuan opposition ten SIR chu mipuite rilru lak pen nan an hmang a ti a. Tunhnaia Bihar inthlana an chaklohna laka mipui rilru hruai kawina hmanruaah an hmang niin a puh a ni.

Lok Sabha ah chaun Union Home Minister Amit Shah-an Vande Mataram chungchang sawiin vawiina an sawihona chuan thalai lo la awm turte thinlungah a pawimawhna leh ropuina a tuh dawn a ni a ti. Vande Mataram chu ram tana inpekna, inhlanna leh ram hmangaihna thinlung pe thei hla anih thu a sawi a. Ram zalenna sual kawngah mipuite thinlung kaihruaitu a nih thu a sawi a ni.

<><><>